

四庫全書

史部

欽定四庫全書

欽定石峯堡紀畧卷七

五月二十七日辛巳甘肅布政使馮光熊奏言現  
在勦辦賊回供支官兵口糧料草係臣專責所有  
沿途經過地方臣已飛飭按例供支其駐劄官兵  
之所查河東各屬倉儲糧料均屬充裕無難調撥  
惟賊踪無定須多備乾糧炒麵以便攜帶追勦臣  
亦早飭預備供運至草束一項河東廩貯甚少現

飭上緊採買倘有不敷酌量就近機運臣已知會

臬司陳步瀛彼此商酌妥辦總期無誤供支至省

城地方回民雜處必須嚴密防範臣仰遵

聖訓曉諭老教回民協力查拏如有自他處潰散潛逃

煽惑者立即擒獻並于各隘口多撥兵役安設卡

倫晝夜巡防節據附近各處拏獲潛來匪黨並督

臣飭拏之要犯李應登張守祿馬德田文貴馬五

十九馬忠馬清等或係從賊打仗或係謀逆知情

隨時訊明稟請督臣將各犯先後正法臣惟有督  
同在省文武各官嚴密稽查俾逆犯不致漏網現  
在省城及各屬連次得有透雨麥苗暢茂糧價不  
昂民情安堵奏入

上諭曰妥當但所奏畧遲矣以後十日半月即當奏聞  
汝曾在軍機處行走豈不知朕屢念乎

同日畢沅奏言據鳳翔府知府宋鑄稟稱十八日  
亥刻賊匪于秦安之黑石頭川閭坡川等處搶刦

滋擾又據西路州縣稟稱靜寧州屬之底店鎮回匪聚有千人于十七日搶掠隆德縣之五處村庄又靜寧州賊匪于十七日扎營廟兒岔十八日由州屬之雷打灣一帶前進等因臣查賊匪現屯通渭之石峯堡該處後路最多南通甘省之秦州鞏昌東通陝省之隴州汧陽周圍數千里山勢險峻路逕叢雜大兵現俱在通渭北面倘賊人南竄秦鞏或東走汧隴搜捕更為費力就現在情形而論

秦隴一帶必得重兵堵塞絕其後竄之路實為要着總兵三德現帶兵由秦州前進固屬得力但為數不過二千後又無兵接應究屬單薄陝省已無兵可調隣省惟川北一路與漢中接壤若由雲棧而赴鳳隴尚為近便臣一面飛咨四川督臣李世傑飛調川北鎮兵二千星夜前來鳳翔非但汧隴可資鎮壓亦以備三德後應再西省城為西陲扼要之地現存營滿兵止剩二千五百名軍標及

城守營共計不及一千名只數本城防守之用賊匪現在搶掠靜寧隆德莊浪等處已逼近平涼而西安至涇平一帶六七百里內各州縣並無防守之兵深為可慮臣已飛咨山西撫臣農起就近飛調山西兵二千名迅速來至西安聽候調撥奏入上命軍機大臣傳諭李世傑農起曰據畢沅奏現已飛告李世傑調川北鎮兵二千名前來鳳翔並飛咨農起調山西兵二千名來至西安聽候調遣所辦甚是

此時賊勢蔓延必得重兵辦理方能速就殄滅而堵  
塞後路尤關緊要現已續派京兵一千名令復興帶  
領前往著傳諭李世傑即于附近陝省之川北鎮各  
營內挑選精兵二千名令川北鎮總兵富祿帶領分  
起行走由雲棧一帶迅赴鳳隴會同副都統敷倫泰  
在汧隴一帶彈壓防堵兼策應三德後路其所調之  
山西兵丁並著傳諭農起于附近陝省各鎮協標屬  
挑選兵二千名令太原鎮總兵福敏泰帶領分起行

走速赴西安聽候畢沅調撥

上命軍機大臣傳諭阿桂福康安復興曰甘省賊匪跳

梁不法已極必須多派京兵前往方可一鼓殲除著

傳諭復興會同慶桂將京城大器營健銳營兵丁再

行添派一千亦照阿桂所辦成規分為五隊俟阿桂

第五起兵丁起程後復興即授為參贊大臣帶領頭

起兵丁起程所餘四起派隨圍護軍統領善德授為

領隊大臣即赴京城帶領前往其應派侍衛章京著

復興于素所熟悉人員內酌量帶往每隊隔日啟行  
所有派出官兵應得之項即著照例辦給

同日畢沅哈青阿奏言前經臣畢沅

奏調興漢鎮臣三德帶兵一千名駐劄隴州以資堵

禦近因賊匪滋擾靜寧通渭等處復經提臣剛塔

檄調該鎮帶兵赴甘協勦汧陽一帶兵備未免空

虛臣畢沅隨飛調延綏鎮兵一千名興漢鎮兵五

百名前來防禦又副都統敷倫泰亦經帶領軍標

兵五百名前赴隴州相機堵截查逆回自竄聚通  
渭縣之石峯堡後雖意似負嵎死守而迤南秦隴  
一帶萬山重疊俱係鳥道羊腸賊匪最易竄匿此  
時大兵環勦恐其踪跡詭秘四出滋擾隴州等處  
距通渭不過二百餘里而延綏興漢兩鎮標兵程  
途遙遠到隴尚須時日若賊匪乘虛竄入所關匪  
細雖有臣敷倫泰帶兵五百名在彼堵禦而派撥  
一十七處隘口零星分布汎廣兵單實屬不敷防

護亟宜更為籌畫但查陝省調赴甘省征兵西安

滿營軍標撫標共三千五百名各路汎防兵一千

五百名鎮臣三德自隴赴甘帶去兵一千名提臣

剛塔又續調一千名共計七千名現在西同鳳

各營兵業已寥寥無幾至興漢所屬山深路險地

方緊要目下存營兵丁亦屬有限更無可調之兵

臣等商酌再挑滿營駐防兵五百名選派幹練大

員帶領前往鳳翔即交敷倫泰酌量調遣預備堵

截擒拏即令于二十一起程前進至滿營現在  
乏人臣哈青阿留於西省城操演存營兵丁辦

理事務奏入

上命軍機大臣傳諭阿桂福康安畢沅哈青阿曰逆回  
竄聚通渭縣之鹿鹿山馬家坪等處恐其乘間南逸  
秦隴一帶不可不預為防範其靜寧隆德平涼等處  
尤為驛站衝衢逼近陝省之長武邠乾一帶必須多  
兵防守以資堵禦現已有旨傳諭農起李世傑迅速

選派河東川北兵各二千名文福敏泰富祿就近帶  
領赴陝防守並傳諭復興再挑健銳大器兩營兵一  
千名分起帶領前往統計此次調派之兵又有五千  
名軍勢不為不盛計阿桂等過陝抵甘時各處之兵  
亦可陸續到齊阿桂等務飭各帶兵大員嚴密堵禦  
毋使一名竄入陝境以致復有蔓延至西南省城現  
無滿員彈壓即着哈青阿在彼帮同畢沅操演存營  
兵丁鎮守辦理

同日農起奏言臣接准西安撫臣畢沅咨調晉省

兵二千名星赴西安防守臣隨于省南附近各營

內挑兵二千名咨會太原鎮臣福敏泰帶領諸練

將弁即日起程星夜趕赴西安聽候派撥惟查逆

回逼近陝疆而晉省蒲州與潼關僅一河之隔距

西安省城亦止三百餘里實為兩省扼要臣現擬

派撥大同鎮兵一千名親身帶赴蒲州駐劄俾與

陝省聲息相通以壯聲援而資策應併可于要隘

處所堵防逆回竄逸入境奏入報

聞

二十九日癸卯傅玉永安奏言臣等在鹿鹿山與賊對面安營商議相機進勦十三日辰刻起至十四日未刻大雨連綿繼以大霧至十七日霧散後據卡倫兵報稱賊人已于雨霧時不知竄往何方臣等即派幹練官兵四面尋捕旋據報稱賊人竄入通渭之烏家坪等處設立營座查自鹿鹿山至

石峯堡相距三十里臣等將現在軍營所有滿漢官兵二千名仍在鹿鹿山立營以截賊衆前往安定會寧靜寧州縣之去路其五岱剛塔等帶領各處兵丁于十九日起程向烏家坪等處追逐賊匪查此時逆回頭目將眷屬盡移于石峯堡內而現在新教回匪糾合各處回民入夥設有不從即行殺害臣等自入甘界據報被掠之日皆稱五月初五日又將所獲回匪審訊俱供新教回衆共約于

五月初五日一齊起手並欲將官弁兵丁誘進石  
峯堡狹窄山谷之中內外夾攻等語又詢問鹿鹿  
山附近之年老民人據稱石峯堡本係舊時險要  
處所去歲五月間新教回人復又修理堅固伏思  
各處調來兵丁合計約有一萬餘人俟到齊時將  
石峯堡四面進逼圍裹既可斷賊人來援之路而  
堡內回衆亦不敢更出抵禦再將軍營現有子母  
鐵砲排立堡門俟賊匪出時點放轟擊再運大砲

周圍排列對向石峯堡接連施放逆回男婦既可  
盡就殲除並可將石峯堡推燬所有應用大砲行  
知陝甘總督李侍堯陝西巡撫畢沅預先備辦以  
俟調用臣等訪知地方情形據實具

奏並繪圖呈

覽奏入

上命軍機大臣傳諭阿桂福康安曰據傅玉等奏賊匪  
現佔之石峯堡形勢險要請俟所調各處官兵到齊

再四面圍攻並用砲轟擊等語總不成話前據五岱  
剛塔等奏十七日有賊千餘名逸出鹿鹿山至離山  
七十里之烏家坪扎營五岱剛塔等帶兵前往追勦  
現在鹿鹿山石峯堡尚有賊數千留傅玉永安在鹿  
鹿山要口奪營堵禦何以本日傅玉摺內又稱自十  
三日以後連日大雨繼以大霧至十七日霧散賊已  
逃竄不知去向是鹿鹿山現已並無賊匪傅玉雖年  
老糊塗豈不知賊已潛逃斷無坐擁重兵圍守空山

之理乃該將軍等並不前赴烏家坪會同協勦轉以空言獻策思為用巧之計傅玉永安何不曉事至于此極著傳旨嚴行申飭再據傅玉奏訊之居民人等稱石峯堡本係舊時險要上年五月間新教回人又加修理整固衆回人約定本年五月初五日起事是以通渭靜寧各州縣據報均係同日被賊搶刦等語石峯堡一帶地方自必設有營汎兵弁並州縣文員管轄今賊人于上年公然聚集多人在該處修理城

堡預營巢穴附近居民既經共知豈有該處員弁兵  
役等獨無聞見之理此事以傳玉之無能尚知詢問  
土人訪出情節何以李侍堯剛塔節次拿獲賊匪奸  
細審問供詞轉無一人將此事供出伊等又並不訊  
及至賊人起事早經定有日期傳玉以客官甫抵甘  
境即聞紛紛傳說訊之居民及所獲賊犯供亦相同  
何以李侍堯等屢次摺內總未據奏聞看來李侍堯  
竟係有心迴護剛減供詞以為避罪之計福康安先

抵甘省即當將傅玉所奏五月五日起事及去年五月修理石峯堡情節迅速詳細查明阿桂亦應于沿途留心訪問如李侍堯于賊匪謀逆修理城堡各緣由果有隱諱不奏之處是革職不足以蔽辜著阿桂福康安即將伊等問速解熱河先將此等情節嚴審錄供具奏其石峯堡係何府縣營汎所轄地方賊人如此預謀聚衆肆逆不法該管文武員弁所司何事並著福康安逐一查明將專管之文武員弁革職拏

問審明治罪其兼管之文武各員亦着一併叅奏又  
閱傅玉所繪圖內石峯堡係在衆山之中想周圍地  
面亦不甚廣濶賊人家眷俱藏匿在內其意似不肯  
復行遠颺該處勢如釜底此時所調之西寧寧夏阿  
拉善四川屯練各項兵丁自己陸續到彼兵力既厚  
自無難設法堵截圍勦計福康安月內即可行抵該  
處務宜詳細妥籌迅速嚴事至此事始經發覺時係  
據紅澇壩鄉約李應得李化雄等稟首嗣又據剛塔

奏稱有大莊回民馬世雄帶眷投案稟稱石峯堡回民聚集謀逆糾伊入夥連夜前來首報等語此等誠實民人既肯舉報賊情李侍堯剛塔若將該民人留于軍營作為鄉導自可得進兵路徑李應得等前已給予外委頂帶著福康安再各拔補千總其馬世雄亦著一體賞給千總以示勸獎並派令隨營充當嚮導領路進剿自更得力

同日河南巡撫何裕城奏言竊臣遵

旨籌辦京兵過境事宜當即飭令布政使江蘭欽遵妥  
協經理伏查京兵過境一切供支事宜豫省歷經  
有舊定章程臣隨飭諭各府州縣將需用車輛馬  
匹草料及尖宿處所妥為籌畫于官兵未到之前  
預辦齊全查官兵由孟縣之黃河過渡現屆汎水  
長發之時臣已派令懷慶府知府布顏河南府知  
府萬寧預備船隻分駐兩岸接起照料至自豫入  
陝共計十一臺道遠站長應添派大員協辦以期

妥速藩司江蘭應先赴入境之安陽首站經理其  
出境之閩鄉末站臣已添派糧儲道海廣適中之  
孟津一帶派候補道吳承緒會同該管道府督率  
照料妥為應付仍責成藩司江蘭總理其事務使  
軍行迅速沿途毋稍留滯奏入報

聞

六月初一日甲申

上諭內閣曰甘省逆回滋事先經革職總督李侍堯等

奏稱此事因小山回匪田五等謀興新教起釁朕以  
該犯等欲倡興新教何必糾衆謀逆降旨飭詢始據  
該督將本年正月內田五即至靖遠與哈得咸哈彥  
商同謀逆各情節覆奏昨又據西安將軍傅玉奏訊  
之甘省居民僉稱衆回匪於上年五月即修理石峯  
堡並約定於本年五月五日起事通渭等處亦據報  
係同日被賊搶刦等語是賊人肆逆不法早已預蓄  
奸謀並非因爭教而起夫内地回人其來已久我國

家威稜遠播平定準部回部西域咸隸版圖新疆回人年班入覲往來絡繹內地民人亦多至回疆貿易其有查對經卷講習規條者相習為常例所不禁遂有紅帽白帽新教舊教之名其實西域新疆之回人正其舊教也且現在內地回民所習之教所講之經皆與喀什噶爾葉爾羌等處回人經教無異原無新舊之別况內外均屬編氓赤子順則恩有必加逆則法無可宥今賊首田五已就殲斃其餘黨馬鬍子李

鬪子等膽敢於光天化日之下聚衆鴟張攻城掠堡  
即屬回民中之邪教如僧中白蓮教之類而已昨已  
命大學士阿桂陝甘總督福康安前往督辦並派京  
兵及飛調四川屯練降番暨阿拉善各處蒙古兵丁  
到彼協勦大兵雲集諒此么麼小醜自無難處就殲  
除阿桂福康安於勦滅賊匪後祇須將賊人經過煽  
誘之處所有平時與賊勾結知情及賊人起事後代  
為往來送信接濟糧食之人即係邪教亂民必須實

力搜捕正法勿復如李侍堯之養癱其餘並未從逆  
之回人皆係良民不必更分舊教新教概毋庸波及  
以免株連總之查辦此事止當分別從逆與否邪正  
之殊不必論其教之新舊即如僧道原非例禁而白  
蓮等邪教之必應查究者亦以其左道惑民聚衆滋  
事也嗣後凡從逆回匪俱稱為邪教不必復分新舊  
教名目俾回人等咸知朕洞悉其教根源不分畛域  
斷不因滋事賊匪將無辜守法良民一併株連之至

意將此通諭中外知之

同日保寧李世傑成德奏言准西安將軍傅玉等  
咨令派撥四川屯練降番二千名由鞏昌秦州一  
帶飛赴通渭縣軍營協同勦捕臣等隨飛札署松  
潘鎮總兵那蘓圖並維州協副將李天佑懋功協  
副將張芝元在襟谷腦五寨及新疆屯練降番內  
挑選曾經出師之屯練降番二千名即飭該副將  
李天佑張芝元並守備張占魁等分起帶領臣保

寧臣成德擬帶軍督提三標綠營兵丁六百名即

日分起由省城星夜馳赴松潘統領各弁兵由柴

門關取道遄行前至通渭縣地方協同傅玉等悉

力勦捕至屯練降番係松茂道所屬臣李世傑已

飭該道李永祺星赴各該處督率沿途經過地方

將一切應付事宜妥協辦理再松潘本與甘省接

壤未便乏大員鎮守該鎮兵丁應免其調撥即令

署總兵那蘓圖分布各隘口嚴密彈壓稽查並照

料各兵進發奏入報

聞

同日山西太原鎮總兵福敏奏言准提臣農起

咨調太原鎮兵二千名前赴西安聽候派撥臣即

於左右二營併平陽營派兵九百名蒲州各營派

兵一千一百名共二千名臣帶領標營隨征將弁

兵丁於五月二十六日起程其所屬官兵併即嚴

催星馳前進奏入報

聞

同日西安副都統敷倫泰奏言臣遵奉

諭旨趕赴甘肅隨同福康安等勦賊正在帶兵起程時據撫臣畢沅以甘肅接壤之隴州等處甚屬緊要

必須防守截禦所有西安簡派之綠營兵五百名

現無大員督領奏令臣帶領此項兵丁又滿兵二

十名官弁二員前至隴州所屬官山地方分兵駐

守要隘臣即于五月二十二日起程前往因隴州

一帶連山綿亘小路甚多所帶五百兵丁尚屬不  
敷畢沅又已續調官兵接應俟續調兵至再酌量  
緊要地方增兵防守哨探賊人由何路前來即帶  
領官兵盡力勦擊俟畢沅等派遣更換之人到來  
仍迅速前往福康安軍營隨同効力奏入報

聞

初二日乙酉李侍堯五岱剛塔俞金鰲圖桑阿阿  
爾薩朗奏言賊回於鹿鹿山後竄往烏家坪臣五

岱剛塔俞金鰲圖桑阿于十九日帶兵追捕臣李

侍堯亦于二十日自安定起程馳赴軍營聞賊匪

現在伏羌攻城臣李侍堯即帶兵星速行走二十

二日巳刻抵伏羌臣五岱等先于本日辰刻趕到

賊人正在關廟焚槍勢甚猖獗並分賊匪于關外

山梁扎營約共千餘人臣等隨酌帶弁兵前往關

廟賊匪見官兵驟至藏匿樹林民房之內街路逼

窄官兵難于施展先以馬兵挑鬪賊又不出繼以

步兵誘戰賊隨撲出關廂抵禦官兵施放鎗箭殺  
賊數名賊復遁匿因兵丁連日趕累行走未免稍  
乏又天色漸晚隨暫行撤退薄暮時賊又潛來窺  
伺欲圖乘間攻撲經官兵兩次放鎗擊退臣等計  
以賊人尚據關廂必料城內恃官兵已到防守稍  
懈為乘夜攻城之計隨于夜間挑派弁兵數百名  
進逼關廂放鎗使賊竟夜不寧無暇攻擾城內二  
十三日黎明臣李侍堯等復挑派奮勇兵一千二

百名親身帶領勦捕適臣阿爾薩朗亦抵軍營一同帶兵打仗賊人拚命撲出勢甚兇猛官兵奮勇壓下鎗箭齊放殺傷賊匪三百餘名殺死騎黑馬頭目一名奪馬六匹生擒賊四名賊旋復退匿官兵亦暫行撤回臣李侍堯竊計賊情詭詐屢以虛營牽綴官兵乘間竄逸現在山梁扎營之賊尤防其山後乘空再竄自應分撥弁兵堵截要路商之五岱等僉稱山後岐路甚多若各處多派官兵埋

伏則存營兵力較單若每處止派四五百名則賊人本係亡命之徒當竄走時尤必捨命奔撲恐兵力不能堵禦只可臨期偵視賊踪定竄何處多派官兵遠出前路迎截然後跟踪壓下前後夾攻臣李侍堯剛塔又飛催興漢鎮臣三德所帶兵一千名由秦州一路迅速前來迎勦又臣李侍堯前調河州韓土司兵一千名由鞏昌一路前來計二十六七間必到可資協力殲擒惟是賊匪自竄入馬

家營依山據險抗拒官軍復有石峯堡糾應之賊互相聯絡近又分路四出勾合滋擾其一路自鹿鹿山後繞至通渭伏羌地方焚搶村庄攻犯城垣其一路從石峯堡分竄莊浪隆德華亭靜寧等處鄉村蹊躡滋擾脅脅多人復有靜寧州屬底店地方新教數百人合為一夥並有沿途回匪為所煽誘竟肯棄其家產潛往助逆據隆德莊浪靜寧平涼等州縣紛紛稟請撥兵與民夫協力防守查東

路兵丁大半調赴軍營存營本少其西安官兵現

經將軍傅玉帶領駐扎鹿鹿山臣李侍堯已在附

近各營內通融抽撥兵丁前往但東路本屬兵單

每處止能分派二三百名僅資防守不能勦賊查

前經傅玉奏調寧夏滿兵一千名臣李侍堯續調

寧夏鎮兵五百名近奉

諭旨令阿拉善親王旺沁班巴爾挑派兵一千名又臣

剛塔前調延綏鎮兵一千名此三處官兵臣李侍

堯已飛文行催迅赴靜寧隆德一帶勦捕東路之賊臣惟有嚴督將弁兵丁相機上緊勦捕以期迅速完結

李侍堯剛塔又奏言接據真司陳步瀛稟稱隆德縣潘隴山聚賊數千立有旗幟并放探馬十餘匹四散分馳等語查賊人勾合接應愈聚愈多陝甘可調之兵業經先後檄調雖有寧夏阿拉善之兵臣已飛文令其即由東路前往靜寧隆德一帶勦

捕但看來賊匪情形恐現集之兵尚未即能收拾  
仰懇

皇上再于附近省分派兵星速前來分路勦捕不致再  
有蔓延

同日杭州將軍永鐸奏言

臣蒙

恩補授杭州將軍於未赴任之前奏請前往甘省協同  
勦賊五月十九日抵靜寧州途遇綠營官兵臣向領  
兵守備趙承謨詳加詢問據稱俱係西安綠營兵

原隨副都統明善前往因明善陣亡盡皆撤回靜  
寧州五月十五日按察使陳步瀛曾至靜寧派  
守備趙承謨帶領此項兵丁五百名往隆德靜寧  
交界之鄒家河地方設放卡倫於十八日已刻與  
石峯堡前來之賊四五百名打仗互有殺傷我兵  
得一山梁據守賊亦漸散嗣知府王立柱知州涂  
躍龍探知賊人離城切近即行咨將此項兵丁仍  
撤至靜寧地方防守州城臣至靜寧時陳步瀛已

回安定據王立柱等告稱距隆德縣四十里靜寧州九十里南山之內底店地方有千餘戶回匪俱于山頂安營欲與石峯堡回匪會合所有附近之威隆堡各處村庄肆行搶劫等語查現在城中兵共有七百餘名臣即率同知府王立柱等督飭守城自十九日至二十二日不分晝夜嚴防固守今靜寧州城已可無虞但賊夥甚衆若兵力單少亦難迅即勦滅臣一面飛咨將軍傅玉督臣李侍堯

等星速發兵一面飭令各員弁嚴守州城臣即趕赴鹿鹿山軍營面見傅玉等將現在東路情形詳悉告知均奏入

上命軍機大臣傳諭阿桂福康安五岱曰賊人於靜寧隆德一帶分出滋擾福康安若前赴伏羌不但途次或有梗塞且靜寧迤東亦無重兵防禦轉恐賊人或躡官軍之後本日據永鐸奏稱靜寧州存有守城兵七百餘名又前據策卜坦奏稱已帶兵一千名赴靜

寧一帶探勦是該處現有一千七百餘名而此時鹿  
鹿山並無賊匪傅玉等尚有滿兵二千餘名在彼坐  
守空山福康安當迅速札知傅玉等令其帶兵自西  
而東福康安即帶延綏靜寧之兵自東而西再飛札  
旺沁班巴爾帶領寧夏滿兵及阿拉善蒙古兵赴靜  
寧一帶三路夾攻會勦阿桂帶領京兵不日抵甘又  
可為其後勁務將隆德靜寧石峯堡等處賊匪勦滅  
淨盡如攻搶伏羌之賊復竄入石峯堡會合一處則

勢如釜底更易於四面堵圍惟前據傅玉等奏拏獲  
賊匪奸細供稱賊人想把官兵誘至石峯堡裏外夾  
攻等語業經諭令福康安等須留心慎重福康安先  
與海蘭察巴圖魯侍衛等同行必能加意防範自可  
無虞賊人奸計至永鐸奏稱靜寧一帶已無賊匪現  
赴五岱等打仗處所協勦此摺係二十四日亥時拜  
發而二十五日辰時靜寧州即有賊匪復來滋擾之  
事諒該將軍此時未必即能前往伏羌自仍在靜寧

守城著即令其帮同福康安勦辦賊匪至賊人現在  
靜寧隆德等處刦掠幸而未據六盤山該山為從來  
險要關隘福康安尤當即速設法派兵扼險駐守斷  
不可使賊乘間侵佔致東西兩路官兵或有阻隔又  
五岱等奏稱伏羌城外山梁扎營之賊防其乘空再  
竄但分兵堵截存營兵力較單不能堵禦只可臨期  
偵視相機迎截等語所想亦是五岱李侍堯等此時  
竟宜專力勦辦伏羌之賊牽綴其勢勿使竄逸勾結

則福康安在東路勦辦石峯堡賊匪尤易為力倘伏羌之賊亦敗回石峯堡內則五岱等又可從南面追及彼此知會四面圍堵使賊人困處一隅不戰自斃更不致一名漏網也

上又命軍機大臣傳諭阿桂福康安曰據五岱李侍堯等奏官兵在伏羌城外擊退賊匪因兵丁連日趕緊行走未免稍乏又天色漸晚暫行撤退等語賊人屢次遁逃五岱剛塔等帶兵尾追俱落賊人之後何以

賊行不泛而官兵乃以行走力乏為藉口此皆綠營  
恇怯之陋習前明邊鎮往往坐此以致老師糜餉我  
國家整勵戎行雖各省綠營兵丁不能如滿州之勁  
銳無前而平時一律訓練亦不應自形氣餒為將領  
者固當體恤兵丁而臨陣豈可不加之策勵看來此  
時李侍堯剛塔早已志氣委靡一籌莫展而五岱又  
係客官呼應不靈且伊本烏拉齊之人遇事若得便  
宜則高興勇往不得便宜即不能振作朕亦不加之

責備阿桂福康安素嫻軍旅自能調度合宜俾官兵  
日有起色壁壘一新賊人望風膽落無難剋期集事  
至賊人聚衆鴟張立有旗幟并遣出党羽四散分馳  
其中必更有為首之人如山東之王倫撒拉爾之蘿  
四十三羣賊聽其指揮雖前據李侍堯等奏稱田五  
斃後尚有李鬍子馬鬍子等然伊二人亦豈肯各稱  
頭目不相上下而衆人咸稟其指使今五岱等既經  
挾獲活賊四名何以不將此等繫要情節詳細訊及

著傳諭五岱等即將賊營現在情形作何商謀肆逆  
及分路滋擾究係何人為首主謀何人分帶羣賊之  
處俱逐一審明一面錄供具奏一面即將該犯正法  
再據永鐸所奏底店回匪既與石峯堡回匪會合焚  
劫現在是否聚集一處且業經劫掠村庄傷害百姓  
即屬肆逆之人阿桂福康安勦滅賊匪即當帶兵先  
至該處將各該犯全數勦洗勿使一名漏網以清後  
路至永鐸奏請赴軍營協勦着准其所請先協同李

侍堯傅玉等奮勉勦賊再俟阿桂福康安到彼隨同  
勦辦於將次完竣時即由驛馳赴熱河陞見以便詢  
問一切情形至軍營所有兵丁本已不少總緣調度  
無人屢次打仗間有傷亡未免氣餒福康安此時計  
已將到而所調之寧夏西寧阿拉善各處精銳兵丁  
四路雲集福康安務宜振作士氣使人人都躍躍爭先  
將賊匪四面截堵圍攻自不難剋日奏功盡數殲滅  
上又命軍機大臣傳諭福康安畢沅曰本日據五岱等

奏到在伏羌縣與賊人打仗情形一摺傳牌上粘貼  
涇陽驛紅帖一紙內稱賊回五月二十五日由東路  
來至靜寧州關外放火於南門外翠屏山扎營官路  
沮滯不能行走此摺係由涇陽驛差人探山步行遞  
送等語靜寧隆德一帶為驛站衝途文報往來絡驛  
今被賊人佔據該州之翠屏山及隆德之潘龍山梗  
塞官路以致文報由小路步行遞送殊屬非便此時  
賊若散去固好若尚在隆德一帶現在五岱李侍堯

等於伏羌縣地方駐兵該處離汧陽隴州不遠著傳  
諭福康安畢沅會同商酌或可於該處安設臺站使  
伏羌一路文報即由汧陽入陝東達咸陽西安較為  
便捷如福康安到彼所有靜寧隆德等處賊匪業經  
勦洗淨盡即可毋庸改設否則與其繞道步行不若  
竟於汧隴一帶安設臺站之為妥速也著福康安等  
會同辦理具奏至涇陽驛馬夫因大路阻梗差人探  
路步行傳送甚屬能事着福康安到甘時查明優加

獎賞以示鼓勵



欽定石峯堡紀畧卷七

欽定四庫全書

欽定石峯堡紀畧

史部

卷八至十

中書臣張經田覆勘

總校官檢討臣何思鈞

欽定四庫全書

欽定石峯堡紀畧卷八

六月初四日丁亥傳玉永安奏言臣等在鹿鹿山

安營四面安設卡倫防護二十四日黎明據報稱

東南山梁有數百馬步賊匪臣即整兵截禦賊人

來路臨近施放鳥鎗殺傷甚衆賊即奔敗臣等帶

領官兵追擊攀越兩山賊皆竄入山溝之內計殺

賊四五十名生擒二名嚴加審訊據供新教為首

賊張阿渾帶領數百人前往伏羌等處搶掠又有  
不知姓名頭人領衆數百往搶靜寧地方現在又  
有新教頭人馬壯馬良茂馬良貴等領千餘男婦  
在石峯堡藏匿等語訊供後即行正法臣傅玉遵  
奉

諭旨即回西安防守省城奏入

上命軍機大臣傳諭阿桂福康安曰賊人屯聚石峯堡  
復分遣黨羽至隆德縣之潘隴山靜寧州之翠屏山

扎營聚衆搶劫地方寔為可惡是靜寧隆德等處現  
有賊匪滋擾福康安此時諒已早到隆德若不將該  
處賊匪勦除淨盡即行前進不但途次或有梗塞且  
恐賊人奸計故讓欽差經過後又潛分賊衆繞出以  
躡其後最宜留心防範福康安一入甘境必先抵隆  
德潘隴山係在隆德城外昨已有旨諭知福康安策  
卜坦所帶延綏兵丁一千名可以先行應用又莽古  
齊現已帶寧夏滿兵一千名到彼福康安與海蘭察

等竟宜先趁此兵力將潘隴山賊匪勦殺淨盡再至  
靜寧州勦殺翠屏山之賊俟此兩處賊匪辦竣後再  
往石峯堡設法進勦圍堵賊匪家口既俱藏匿石峯  
是該處竟係賊人巢穴而鹿鹿山及搶伏羌之賊現  
有五岱傅玉等兩處牽掣其勢賊自不暇回顧倘鹿  
鹿山與搶伏羌之賊並潘隴山翠屏山各處賊匪俱  
被官兵殺敗竄回石峯堡則傅玉五岱等帶兵由西  
南兩路進勦福康安帶兵由東面會合勦捕阿桂又

帶京兵續至官兵雲集聲勢壯盛賊匪更如釜底游  
魂殲擒自易為力總之福康安勦辦賊匪必由隆德  
以次進剿務須肅清後路雖潘隴山翠屏山賊已勦  
淨仍宜委派幹練將弁帶兵殿後策應勿使石峯堡  
之賊得從間道繞出官軍之後方為周妥至石峯堡  
地勢險隘前據賊匪供稱想把官兵誘入以便裏外  
夾攻業經屢次諭知福康安等務宜倍加小心籌畫  
萬全勿墮其計福康安到彼察看形勢倘該處現到

之兵不敷調遣或賊人衆多一時未能勦捕淨盡必  
須京兵到齊再行會辦不妨於靜寧州城池寬大之  
處暫為駐劄俟阿桂到彼合力進剿亦無不可若福  
康安酌量兵力足以辦賊即不必拘泥等候也再傳  
玉奏拏獲活賊二名訊據供稱石峯堡現有馬壯馬  
良茂馬良貴三人俱係阿渾其搶伏羌之賊係張阿  
渾為首又有不知姓名之阿渾往靜寧等處滋擾等  
語賊營內有如許阿渾又立有旗幟器械馬匹齊備

況前經傅玉等訊出賊人上年五月預修城堡並糾約各處賊回訂期起事各情節是其蓄謀已有二三年之久並非朝夕所能辦之事今賊人逆謀早經顯露百姓皆知而李侍堯及地方文武豈竟毫無聞見著再傳諭阿桂等務將李侍堯貽誤欺飾及賊人逆謀究竟起于何時等情節據實查叅毋得稍存迴護至莽古齊身為將軍既帶兵前至隆德該處現有賊匪滋擾伊即當相機勦捕何得復稱俟與李侍堯商

辦莽古賚年邁無能于此可見著傳旨嚴行申飭看來該將軍在彼不能得力反多屬官一層觀望旺沁班巴爾係寧夏副都統伊現帶阿拉善蒙古兵赴彼協勦莽古賚俟旺沁班巴爾到時即將所帶寧夏滿兵交伊帶領速回寧夏鎮守

初五日戊子福康安奏言臣於二十七日行抵西安是日未刻遞過李侍堯二十四日伏羌所發摺報粘單內開賊已于二十五日攻圍靜寧州燒燬

關廟佔據城外翠屏山將大路截斷此摺係蹈探  
小路步行送出等語臣復將賊匪情形詳悉面詢  
撫臣畢沅據稱節次接到甘省備弁稟報並道路  
傳聞賊匪欲滋擾伏羌秦州隴州等處靜寧隆德  
亦有回匪聚集道路梗塞等因臣思賊勢蔓延竟  
敢如此猖獗實堪髮指必須厚集多兵迅速撲捕  
而此時最為吃緊者尤在救援靜寧州將該處賊  
匪勦滅盡肅清後路以通文報但臣現在所帶

僅止西安滿兵二百名並調到山西蒲州協兵二百名為數無多不足以資攻勦之用而陝省各營官兵大半為甘省調去無可派撥臣現已飛催延綏鎮總兵策卜坦寧夏副都統旺沁班巴爾各帶所調一千名迅速前來平涼會齊臣到彼即相度機宜先將靜寧隆德兩處賊匪勦捕淨盡撥兵駐守即赴伏羌等處會合各路官兵四面圍勦務期迅速歲事仰慰

聖懷惟查汧隴一帶前經撫臣畢沅奏調延綏興漢兩  
鎮前往防禦之兵二千名俱經甘省調去是以另  
派軍標兵五百名交敷倫泰帶領前往預備堵截  
嗣因兵力單弱賊鋒漸近又兩次續派兵八百名  
興漢鎮兵五百名各路存營兵二百名在該處各  
隘口協力防勦此時現有防兵二千名即日可陸  
續到齊但鳳翔隴州汧陽麟遊四處皆與甘省犬  
牙相錯綿延三百餘里隘口一十七處分投調撥

兵力尚單而甘省各處重兵皆在西北兩面攻勦  
賊勢遂漸逼陝疆相距不過一百數十里及二百  
里萬一賊人竄入所關匪細臣已於途次先調太  
原鎮兵八百名即令總兵福敏泰帶領迅速赴陝  
駐劄汧隴適中之處以資防守該處道里遼遠隘  
口甚多恐敷倫泰福敏泰二人照料難周酌派

乾清門侍衛永德火器營參領富保前往協同堵截  
以免踐虞又平涼隆德為甘省扼要之地且係進

兵後路為文報所必經而鞏昌一帶山徑叢雜回  
匪亦多逆回由靜寧伏羌竄入最難防禦若僅于  
要隘處所零星派兵堵截恐于事無濟必得重兵  
駐劄以壯聲援臣擬於續調川北鎮兵二千內鞏  
昌駐兵一千平涼駐兵一千併于撫臣畢沅調取  
太原鎮兵二千內酌派五百名駐守隆德之六盤  
山三百名駐守長武其餘留駐省城防守以備調  
遣如此佈置則東南之汧隴鞏昌既有重兵駐劄

而平涼隆德通陝要路亦厚集兵力其伏羌通渭等處現有五岱等會勦官兵前後策應聲勢聯絡賊匪自無由四竄于勦捕機宜實為得力至潼關遠在西陝省城之東誠如

聖諭賊匪斷無不畏官軍迎截勦殺逕至潼關之理但該處究係重鎮所有潼關協官兵業經剛塔調去三百名現在存營兵僅止百十餘名究為單弱應于所調太原鎮兵入陝時酌留二百名以資彈壓

總之此次逆回專事搶掠忽聚忽散本無庸重煩  
兵力惟其鬼蜮伎倆不肯死守一處如蘇四十三  
之來手待斃且係內地回民於山僻小徑狹隘要  
口皆所熟悉是以屢次翻山而遁皆由剛塔等徒  
事尾追不思四面安排堵截去路以致乘虛竄逸  
到處煽誘勾結蔓延若此剛塔實不能辭諉縱之  
罪而李侍堯則竟張皇失措一味怯懦漫無主見  
況該處所調各路官兵約有萬餘何至與賊相持

一籌莫展殊不可解臣到甘後自當查明據寃嚴  
參斷不敢稍存瞻顧至現在賊匪情形以臣詢之  
畢沅及詳閱各路奏報約畧共有五處蜂屯蟻聚  
出沒無常又陝甘交界跬步皆山處處可以竄逸  
勾結抄截後路而官兵屢次與賊打仗不無損傷  
兵氣日餒不能振作賊匪得以益肆披猖是以此  
時不得不通盤籌畫將各處隘口堵截官兵四面  
合圍自無難剋日殲除至現在調遣各路官兵所

需口糧馬匹以及軍火器械均闢繫要臣已面囑  
畢沅妥為迅速籌備源源接濟並於陝省攜帶劈  
山砲前往以備轟擊賊營之用其經過甘省村庄  
有被賊擾害者即宣示

恩旨如意撫輯俾免失所併於陝省藩庫先備帶銀兩  
與撫臣會商揀派丞倅數員帶往專司撫卹之事  
臣現已出示剴切曉諭回民令其各安本業毋為  
賊匪煽誘即被誘入夥回民內能有將賊匪斬首

擒獻者亦准予自新免其死罪現令各省各屬遍行粘貼以期解散賊黨奏入

上命軍機大臣傳諭阿桂福康安曰據福康安奏稱現在緊要關鍵先當救援靜寧等處肅清後路正與朕節次所降諭旨相合其餘所奏堵截賊人後路以及曉諭回人之處所辦甚好是福康安於勦辦賊匪機宜大端已得朕覽奏為之稍慰惟所稱先將靜寧隆德兩處賊匪勦盡撥兵駐守即赴伏羌等處會勦一

節尚未為周妥靜寧等處賊匪辦竣後尚有石峯堡  
為賊人巢穴必須勦滅淨盡福康安再往伏羌方可  
後路無虞況伏羌鹿鹿山現有傅玉五岱等在彼牽  
掣賊人自無暇迴顧已屢有旨諭知福康安當以次  
進剿自必遵照妥辦計福康安此時早抵平涼該處  
離隆德靜寧不遠就近遣人常川偵探更可得悉賊  
營實在情形相機妥辦靜寧等處賊匪諒無難處就  
撲滅又料福康安與海蘭察帶領巴圖魯侍衛等前

往督辦聲勢壯盛又有阿桂帶領京兵續至恐賊人  
聞風膽落不敢與官軍抗拒紛紛竄回石峯堡而傅  
玉五岱等駐劄鹿鹿山伏羌二處萬一賊人鋌而走  
險乘勢兩面夾攻傅玉五岱等前後兼顧殊覺費力  
深為可慮福康安此時仍宜沿途偵探賊情並先札  
知傅玉五岱等令其預為留心防範後路最為緊要

臣等謹案逆回以底店為門戶以石峯堡為窟  
穴賊衆負嵎抗拒蜂屯蟻聚在石峯堡為尤多

大軍辦竣靜寧隆德之後自以直擣賊巢為要  
我

皇上於福康安奏請先勦靜寧隆德兩處即赴伏羌會  
勦一節

諭令先將石峯堡賊巢勦除淨盡再往伏羌方可無虞  
後路

聖明指示洞徹幾先在事諸臣稟遵

睿畧由底店而及石峯堡以次掃平勢如破竹皆由賊

匪巢穴已得逃竄無路是以不煩追逐駢首就  
縛盡數殲除也

同日福康安又奏言現在京兵已分起起程並調  
遣各路官兵赴甘進剿所有糧務一切關係緊要  
且將來查辦善後事宜均須熟諳幹練之員照料  
辦理懇照上屆之例於

京察一等記名人員內酌派數員令其速赴甘省差  
遣委用再平涼府係入甘門戶且為進兵後路現

擬駐劄重兵必得專員彈壓而陝省無可派委之人查尚安蒙

恩以四品銜派赴土魯番辦事業經起程將次可到臣已飛札催其速即到陝令在平涼駐守俟事竣後再赴新疆辦事奏入

上諭內閣曰現在甘省勦捕逆回一切軍糧臺站需人辦理著于各部院京察一等記名應用道府人員內派出給事中李殿圖郎中法海員外郎舒弼札克桑

阿舒永阿主事陳科銅崇文馳驛前往甘肅交阿桂  
福康安差遣委用遇有相當缺出酌量題補並著即  
日起程不必來熱河請訓

初六日己丑阿桂奏言臣于途次接奉

上諭調派河東川北兵各二千名交福敏泰富祿就近  
帶領赴陝防守併傳諭復興再挑選健銳火器營兵  
一千名分起帶領前往臣查逆回于通渭一帶既負  
嵎抗守復潛出滋擾或乘間遁入陝西亦未可定

伏思甘肅涇州地方與陝西接壤山勢連延為陝  
甘門戶自應駐兵防守臣已飛札行知太原鎮總  
兵福敏泰即帶領河東兵二千名前赴涇州駐劄  
堵禦如有更調之處臨時度量情形另行檄遵其  
此項兵丁到甘駐守時應需口糧一切恐甘省力  
有不敷臣已飛札畢沅即就近由陝省預備供支  
至川北赴甘兵丁若由白馬關一路行走可以直  
至鞏昌且道路亦較捷近但現在逆回滋事雖附

近鞏昌且賊踪無定或又有無須徑赴鞏昌之處  
臣此時無從懸揣已飛札福康安就近酌量情形  
川兵或應由白馬關一路直達鞏昌或應由棧道  
行走經寶雞鳳翔一帶繞至賊人後路之秦州酌  
定後即飛劄富祿令其遵照遄行再甘省地方素  
稱貧瘠此時派調各路大兵雲集境內軍需一切  
未必能辦理裕如現在京兵由陝入甘所有安設  
車馬按站遞進及兵丁等騎赴軍營之馬併鍋帳

口糧等項均關緊要恐甘省此時無暇接應臣擬將京兵所需一切供支亦于陝省代為籌辦以分甘省之力臣亦飛札畢沅令其妥協經理勿致臨時有悞此次調派官兵聲勢已盛臣到彼後惟有悉心努力迅期掃滅賊氛以仰慰

聖懷

同日畢沅奏言接准兵部咨開京兵一千名分為四起行走大學士公阿桂定於本月二十四日帶

領頭起官兵由京起程臣當即與布政使圖薩布  
按察使王昶公同酌議除供支一切事宜按照舊  
定章程妥為辦理外其車馬一項陝省雖尚易辦  
而自邠乾以西地方貧瘠民間多用牛車罕畜驃  
馬至甘省之靜寧隆德等處賊匪四出滋擾若仍  
用車馬按站倒換未免雇備維艱必須通融籌辦  
方得軍行無阻除帶兵官員及跟役人等為數無  
多各驛馬匹車輛足敷應用應請照例供支外其

京兵沿途乘坐向例每名給馬一匹每六名給行李車一輛此次自應另為變通從前金川用兵臣曾僱備長驛供送京兵由雲棧直達成都分起行走並無貽悞四十六年有京兵進剿撒拉爾逆回之信亦經臣議改驛頭供送

奏准預備在案此次京兵赴甘自華陰直達軍營計程不過千里京兵止能日行一大站應請仍照前議備辦現已飛飭各屬雇就腳驛一俟京兵入華

陰首站每兵改給長驃一頭共湏驃一千頭其駄  
載軍裝等項亦請改車用驃緣驃頭負重致遠最  
為得力而甘省現在各路軍營多係山坡小徑車  
輛不通惟驃頭行走較為便捷查三十八年備供  
赴川京兵每兵二名給與駄驃一頭今照此雇備  
共驃五百頭此外再備餘驃二百頭如稍有疲乏  
即行更換以利遄行通共用驃一千七百頭俱向  
腳戶雇覓查陝省舊例棧外每頭每百里給腳價

二錢六分現值軍興之際草料等項市價稍昂兼以剋期前進而迤西一帶山路頗多應請照金川例給銀三錢則腳戶不至賠累各驃頭多赶赴前來自可不虞缺乏至京兵所帶跟役亦即照金川舊例每名按站折給銀一錢令其步行前往如此辦理既不致擾累民間而軍行亦無阻滯自可剋日前抵賊巢以資會勦于軍務實有裨益

畢沅又奏言查鳳翔隴州汧陽麟遊四州縣皆與

甘省犬牙相錯山深徑僻處處可通雖經撥有防禦兵二千名尚覺兵力稍單現有臣福康安所調太原鎮兵八百名已據該鎮福敏泰先行帶領來陝即日可到西安應令前赴汧隴適中之地札營屯守至現調各路官兵協同勦捕又

欽派大臣等帶領火器健銳二營勁旅前來所有需用大藥最為緊要臣前准西安將軍傅玉等調取當即在西安軍大局內先撥大藥一萬觔鉛丸二萬

勦火繩八萬丈立刻委員解赴涇州撥兵護送前  
去但鎗砲為行軍利器火藥等項須及早寬為預  
備西安局內存貯僅七萬有餘雖趕緊製造尚恐  
緩不濟急因飛咨山西河南將現貯火藥各調撥  
五萬勦委員迅解來陝收貯西安以便陸續轉解  
軍營應用再平涼以西回匪沿途竄掠所有山西  
山東河南等省解甘餉鞘若照常運往恐有失誤  
臣與藩司商酌俟各餉鞘到西安時暫行截留藩

庫其各該處尚未起運者咨令暫停有已解在途者行令即於所到州縣截留統俟勦滅逆回事竣再行解甘均奏入

上命軍機大臣傳諭阿桂福康安曰據阿桂奏京兵所需一切供支即於陝省代為籌辦以分甘省之力自應如此辦理本日據畢沅奏稱京兵車馬一項按站倒換未免雇備維艱已飛飭各屬雇就長驛應用等語是甘省遇兵事宜業經畢沅妥為預備自可迅速

前進至所稱各省解甘餉鞘若照常運往恐有疎虞  
俟到西安時截留藩庫所辦甚是餉鞘乃陸續支發  
之項非比軍中火藥等項急于應用況甘肅藩庫現  
在尚有四百餘萬足敷給發此項餉鞘自應暫留陝  
省俟隆德靜寧一帶勦除賊匪淨盡再行運往未為  
遲也

同日五岱李侍堯剛塔俞金鰲圖桑阿阿爾薩朗  
奏言臣等於二十二三等日在伏羌擊勦賊匪殲

斃頭目三人連夜派兵逼近關廟放鎗使之竟夜  
不寧所有關廟樹林內之賊均即竄上山梁臣等  
即派兵於關廟樹林內及所據民房並沿山溝內  
搜捕拏獲活賊二十九名帶傷賊七名婦女幼孩  
二百餘名隨令守城出力之老教鄉約白中偉等  
逐一辨認此內實係避賊良民眷屬共三十九口  
即行釋放其餘均係賊回家口即行正法訖又因  
城內止有民夫恐賊人乘間復來滋擾當即派兵

三百名入城防守復恐賊人既退上山梁復欲翻山而遁隨派遊擊汪啓懷塔哈帶馬兵四百名乘勢繞上山梁攻搶賊營賊即棄營往南竄去官兵壓下將至管子鎮賊知官兵已近復遠道渡河仍回北山豐社廟山梁上札營臣等即派遊擊皂王保伯泰等帶兵六百名又派都司舒寧阿帶楊土司兵一千名從北山梁迎往截勦並可遏其前往石峯堡之路臣等將現在所有之兵全行帶領由

中路前往追捕適漢興鎮臣三德具報帶兵一千  
名於二十二日在清水縣起程前來臣等復催令  
星程迎勦更可在秦州一帶攔截殲擒

李侍堯又奏言查平涼隆德靜寧均係甘省衝衢  
要路文報絡繹誠恐萬一疎虞自當預為籌畫擬  
將奏摺文報改由軍臺馳遞較為穩妥但蘭州至  
涼州向無軍臺臣現在飭撥臣標馬一百二十匹  
安設十二臺直至涼州之大河驛接上邊路軍臺

約計道里遠近不甚懸殊仰懇

皇上飭部將由京所發文報亦暫改從軍臺轉遞不致

貽悞均奏入

上命軍機大臣傳諭阿桂福康安五岱曰此次五岱等  
勦擊賊匪殲其頭目三人且慮賊翻山逃遁派兵繞  
上山梁攻搶賊營較前稍有起色看來伊等因朕以  
該處領兵大員不能辦賊特遣福康安前往督勦亦  
知媿激且聞福康安將抵甘境有所倚仗精神俱畧

加奮勉至賊經官兵追擊即棄營南竄自是向秦州而去五岱等既已派兵前往若能與三德兩面合勦痛加殲洗先肅清一路固屬甚好倘賊人仍竄入石峯堡內該處地勢雖險亦不過如蘇四十三所據之華林山官兵進攻時祇須加意防範據其高處並於左近尋蹕路徑詢之誠實居民或即令為鄉導帶兵尋逕繞上山頂建瓴而下勢如破竹賊人自無由免脫即使路徑險窄官兵實難前進然官兵既不能進

賊亦從何而出果能即其總路帶兵嚴密堵住則賊人困守空山更可不勞窮追而盡數殲除也至伏羌等處賊匪既有五岱等在彼勦辦牽掣賊勢福康安尤可專心勦辦隆德等處之賊隆德現有莽古齊帶到兵一千名靜寧存有守城兵七百餘名而延綏兵一千名阿拉善蒙古兵一千名自己陸續到彼福康安又帶有山西陝西兵四百名是兵力已不為少福康安與海蘭察及巴圖魯侍衛等竟宜趁此兵力先

將隆德潘隴山之賊勦滅淨盡再往靜寧勦捕翠屏山之賊俟此兩處賊匪洗盡然後赴石峯堡設法堵勦但仍應步步留心並派委明幹將領帶兵殿後策應此為最要又據李侍堯奏稱靜寧一帶文報往來恐為賊匪所阻現擬改由蘭州涼州安設軍臺接到沿邊軍臺馳送等語此不過一時權宜之計俟福康安將靜寧隆德等處賊匪辦盡文報仍宜由舊路馳遞較為捷近再據五岱等奏在伏羌城外拏獲賊匪

及婦女幼孩令守城出力之老教鄉約白中偉等逐一辨認等語此等老教鄉約並不為賊人脅誘且助官兵守城禦賊著福康安於勦捕石峯堡賊匪完竣前往伏羌時查明該鄉約白中偉等如果實在出力即應優加獎賞俾老教回民均知感奮

上又命軍機大臣傳諭阿桂福康安敷倫泰福敏泰曰昨據福康安奏前次所調太原鎮兵二千名內已派八百名令福敏泰帶領迅赴汧隴防守本日又據阿

桂奏劄知福敏泰帶領兵二千名前赴涇州駐劄堵  
禦阿桂福康安先後行走未能見面會商是以調派  
福敏泰之兵彼此互異但福康安現在帶兵前往隆  
德一帶勦除賊匪涇州在隆德之東自無虞賊人至  
彼滋擾竟可毋庸留兵防守至潼關又在西省城  
之東離甘省更遠尤可不必留兵在彼惟汧隴為東  
來入陝門戶山深逕僻處處可通且俱有回民居住  
防範堵禦甚闢繫要雖已諭令敷倫泰帶領軍標兵

五百名近復調興漢鎮兵並滿兵共一千三百名及各路存營兵二百名在彼防堵但該處一帶隘口甚多尚恐兵力稍單福敏泰竟應照畢沅所奏酌留兵八百名同敷倫泰在汧隴一帶駐劄防範其餘兵丁一千二百名均應派委將弁帶赴福康安軍營聽候調遣差委其涇州潼關二處竟不必留兵以分軍勢庶各路兵力皆歸實用更可易於歲事

同日馮光熊奏言二十七日戌刻據平涼府知府

王立柱署靜寧州知州涂躍龍稟報賊匪於五月二十五日攻犯靜寧州城經該府等督率兵丁民夫施放鎗砲擲石防禦打傷賊人無數拿獲賊犯馬子倉一名訊明正法賊匪退住城南三里之翠屏山乞速撥兵接濟等語查該處係陝甘大路東通平涼涇州西達會寧安定文報往來最關緊要雖經督臣知會寧夏將軍及阿拉善等處官兵前往勦捕但恐尚未到州查省城現有督臣撥調甘

提屬來蘭防守兵五百名臣已飛令遊擊五十一

守備哈三泰迅速帶兵前往策應惟是該處倘有

疎虞則東西間隔一切運供口糧草料恐有阻滯

查陝省邠州長武與甘省涇州平涼接壤現有

欽差大臣等帶兵前來必須陝省附近各處一體供支

臣飛稟督臣及陝西撫臣畢沅酌籌預辦俾免臨

時貽悞又東路需兵接應而省城防守之兵不敷

分撥臣現在飛調涼州西寧二鎮兵各五百名甘

提及永固協兵一千名肅州鎮兵一千名兼程來  
蘭以備策應奏入報

聞

欽定石峯堡紀畧卷八

欽定四庫全書

欽定石峯堡紀畧卷九

六月初七日庚寅

上諭內閣曰前因甘省逆回滋事所過地方百姓田廬牲畜被其劫掠及聞信驚避遷徙流離者均為可憫已諭令福康安到彼即查明酌量撫恤第念該省現在調集官兵會剿賊匪一切軍糧料草雖俱係地方官發價購辦而沿途輓運未免有需民力是未經被

賊滋擾之處百姓共効供輸亦宜一體加恩均施惠澤所  
有該省本年應徵錢糧著概行豁免如有本年業經  
徵收者著詳悉查明於下年豁免該督務董率所屬  
實力奉行俾閭閻得沾實惠以副朕優加軫恤普沛  
恩施之至意此旨到甘省福康安即謄黃偏諭各屬  
並著該部遵諭速行

臣等謹案甘省編氓蒙

皇上軫切如傷於賊踪所過地方

命重臣查明撫卹所以甦困安良者已無弗至復念大  
兵雲集一切士馬糧芻源源接運皆須民力輓

輸即未經被賊之區亦降

德音而施

愷澤是擾累祇在偏隅而

恩膏普加全省

聖皇雨露之均實與天同量矣

同日李世傑奏言前准西安將軍臣傅玉等咨調

川省屯練降番二千名前往甘肅通渭縣地方合  
勦回匪經將軍臣保寧提督臣成德先行選派省  
城綠營壯健兵丁六百名由成都帶領起程其屯  
練番兵飭令副將李天佑張芝元等帶領前往茲  
于五月二十六日復接西安撫臣畢沅咨調撥川  
兵二千名委員統領星赴鳳隴一帶堵禦臣連日  
探得甘省賊勢蔓延業預飭各鎮協營先為挑選  
兵將聽候調遣茲接咨調之信隨飛飭川北鎮派

兵四百名並於督標派兵八百名提標派兵八百  
名共二千名就近委川北鎮總兵富祿統領剋日  
起程由棧道馳赴鳳隴一帶分派防守堵禦再川  
北一鎮本與陝西連界臣因該鎮屬之昭化廣元  
二縣與甘肅文縣毗連亟須重兵防守是以止就  
近調兵四百名前往并恐該處兵力不敷且須大  
員鎮壓復另調重慶鎮標兵九百名並調建昌鎮  
總兵魁麟馳往昭化廣元等處督率把守再川省

龍安府屬之平武縣松潘鎮屬之漳臘小河南坪等營柴門關黃坪關各處均與甘省文縣互相毗接臣復於川南之建昌戎邊黎雅安阜永寧等營內再酌調兵二千名分撥川北松潘等處繫要隘口協同防禦以期有備無患奏入

上諭曰大勢已定不必張皇總以鎮靜為要

同日李世傑又奏言原任雲南騰越鎮總兵許世亨於四十七年八月丁母艱回籍本年冬間服滿

現聞甘省逆回滋擾情願前赴軍營効力懇

臣代

為奏請

臣

查該鎮前在金川南路軍營節次奮勇

殺賊時

臣

督辦南路糧臺俱所目擊今據該鎮稟

請自効其情詞出於至誠

臣謹附奏

聞並令在成都候

肯奏入

上命軍機大臣傳諭阿桂福康安曰原任雲南騰越鎮  
許世亨前在金川曾著勞績今願赴軍營効力即著

准其馳驛前往甘省聽候阿桂福康安調遣

初八日辛卯五岱李侍堯剛塔俞金鳌圖桑阿阿爾薩朗奏言臣等於五月二十三四等日在伏羌

勦賊打仗搶佔賊營賊人南竄因官兵壓下追勦

又復繞道北回於豐杜山梁札營臣等即分路帶

兵追勦適法靈阿亦抵軍營一同打仗二十六日

辰刻官兵齊至雲霧山近抵賊營臣等正在整兵

之際賊即直前突撲經官兵壓下奮勇勦殺賊人

旋退旋撲四次臣等公同商酌當即分兵兩路直  
搗賊營俾前後受敵臣阿爾薩朗首先帶遊擊德  
海等臣剛塔帶遊擊高人傑等領兵分為左右兩  
路直撲賊人所據山梁與臣五岱等所帶官兵奮  
勇夾攻鎗箭齊發殺賊二百餘名帶傷者甚衆割  
取首級四十一顆生擒賊目馬玉華一名賊人十  
名賊仍竄回山梁據險自守此次官兵打仗甚為  
奮勇而涼州滿兵鳥鎗亦甚得力適興漢鎮臣三

德帶兵一千名亦至與臣等相距二十里即知會該鎮領兵迎截遏其前路現在商同設法勦捕務期盡數殲擒

同日甘肅按察使陳步瀛奏言臣於五月十四日由隆德縣馳抵靜寧州查自高廟山退回之西安滿漢兵尚存九百一十四名次日該州拏獲奸細訊供知石峯堡賊人有勾合底店回匪入夥之信其州屬鄒家河為經由要路隨知會西安協領禪

達禮帶領官兵前往防守一面稟知督

臣李侍堯

等適督臣帶兵赴通渭一帶進剿催

臣馳赴安定

辦理軍糧臣即於十七日起程西行十八日抵安

定旋於二十一日據靜寧州稟報十八日石峯堡

賊千餘人突至鄒家河維時禪達禮已奉將軍檄

調將滿洲兵三百餘名帶赴大營進剿只有守備

趙承謨帶領軍標撫標兵五百餘名與賊打仗殺

賊數十名因賊多兵少不能堵禦賊遂東赴隆德

縣之潘隴山勾合底店各處回匪於附近村莊肆行焚劫據隆德靜寧平涼華亭莊浪等處紛紛稟報臣節次稟請督臣發兵勦捕適賊人圍攻伏羌

縣城督提各臣俱赴伏羌勦賊經督臣派兵二百

赴莊浪防守又兩次發兵八百名赴隆德防守賊

匪已於二十五日越過隆德前犯靜寧州城經平

涼府知府王立柱署州涂躍龍會同都司趙廷選

督率兵民施放鎗砲擊斃賊人甚多賊始退至離

城三里之翠屏山現據該府州稟請火藥鉛彈

臣

即於督

臣

存貯安定火藥內動撥專派弁兵星飛

解往接濟查靜寧為驛站大路靜寧被圍則文報

阻隔經督

臣

奏明一切軍報改由寧夏軍臺馳遞

惟是靜寧距省城僅五百餘里中間會寧安定為

糧運要路現在督提各

臣

追逐伏羌之賊日益南

行相距愈遠恐賊人由靜寧南竄抄奪糧運直襲

大兵之後

臣

已屢次馳稟督

臣

速撥重兵前來防

護現據隴西縣稟報官軍抵伏羌之後殺賊甚多  
重圍已解大兵自可計日北旋至

欽差尚書福康安等將次抵境臣已飛稟陝西撫臣畢

沅即於陝省帶兵來甘以速勦除均奏入

上命軍機大臣傳諭阿桂福康安五岱曰五岱等現在  
勦辦賊匪漸有起色賊人經官軍兩次殲戮已有五

六百名三德現又帶兵到彼遏其前路與五岱等兩  
路會勦是伏羌城外賊匪不滿千名無難迅速殲除

該處賊匪勦捕淨盡官兵毋庸兼顧南路更可專心  
進剿至石峯堡之賊由鄒家河赴隆德縣之潘隴山  
勾合底店各處回匪直撲靜寧州城經該府王立柱  
等督率兵民擊斃賊人甚多賊退至離城三里之翠  
屏山是隆德潘隴山等處賊匪此時竟專在靜寧滋  
擾福康安至隆德時如偵探該縣並無賊匪自必與  
海蘭察巴圖魯侍衛等帶兵速赴靜寧計福康安此  
時早抵該處勦辦賊匪將次完竣已可往石峯堡與

五岱等設法會勦石峯堡地形雖屬險窄然現在大  
兵雲集四面堵截攻圍並尋蹕路徑據其高處建瓴  
而下勢如破竹即可得勦賊淨盡之喜音也至賊營  
內器械馬匹齊備又於上年糾約訂期起事並脩理  
石峯堡是該處竟係賊人預營巢穴以為退守地步  
蓄謀已久必非朝夕所能猝辦其脩理石峯堡時附  
近居民既已共知而地方文武員弁何以竟毫無聞  
見任賊如此肆行無忌若文武各員弁曾經具稟總

督提鎮而總督提鎮等竟置之不辦其罪自專在總督提鎮或係該管之知縣間知信息曾稟知道府該管之營員亦曾稟知專轄之副叅而該道府副叅等竟敢沈匿不為轉稟或竟係州縣營員聞信並不稟報各該管上司以致釀成事端其罪更不可逭前已有旨令阿桂福康安到彼一併查明叅奏著再傳諭阿桂等務宜逐層詳細查明具奏至五岱等所奏生擒之馬玉華係賊人頭目所有賊中情形及起事根

由馬玉華自必知其詳細五岱等何以未經奏及著即速訊供具奏如尚未正法即將馬玉華派委幹練員弁妥慎解赴熱河預備訊問

同日陳步瀛又奏言六月初一日據靜寧州稟稱逆回已於二十七日夜間南竄分為三股一回石峯堡一在底店鎮一在雷打灣係通蓮花城大路又據隆德縣稟稱賊人在縣屬之馬家坪直達靜寧州底店鎮離城四十里寧夏滿漢官兵已於二

十六七等日到縣東路文報已通又據會寧縣稟  
稱二十七日賊人在縣屬之梁家河焚劫村莊是  
靜寧雖已解圍賊仍屯聚於隆德靜寧會寧境內  
若不早為廓清則大路一帶出沒無常文報糧運  
在在可虞似應即由隆德一帶進剿以清肘腋之  
患至寧夏官兵已抵隆德將軍莽古賚面諭隆德  
縣侯阿拉善兵到之日酌議進剿爾時

欽差尚書福康安等亦將抵境其應由何路進兵之處

臣即馳赴隆德將賊匪情形詳悉面稟聽候裁酌再督提各臣已赴秦安追賊距會寧安定較遠臣

已飛飭鞏昌秦州二屬附近秦安之各州縣趕運

軍糧其現駐隆德官兵由平涼涇州固原華亭各

州縣辦運軍糧較為便捷臣已飛飭平涼府知府

王立柱督催赶辦其火藥鉛彈南路軍營現在俱

由蘭州省城陸續運送其東路軍營如有不敷臣

即飛稟陝西撫臣畢沅就近酌撥協濟臣因現赴

隆德已將南路軍營糧草火藥等項諱囑蘭州道  
宋綺琦上緊嚴催東路糧草火藥

臣

與侍衛職銜

蘇凌阿竭力趕運總期源源接濟無悞供支至馬

昇貴一犯係署靜寧州凜躍龍拏獲奸細供出該

犯亦與田五往來經固原州拏送鹽茶廳維時伊

孫馬如林馬如海尚未能到據該州王琮稟報勘

驗該犯房屋在城外靠城居住屋內挖有地窖可

容數百人研訊該犯只供三月內田五遣人告知

造反之事其間挖地窖緣由堅不供吐及

臣奉督

臣檄調經過固原詢知伊子馬漢龍在城內靠城

居住隨親往查看則馬漢龍院內亦有開挖地窖

雖距伊父城外之窖尚遠其為逆賊詭謀已屬顯

然查地窖必非伊父子一二人所能辦之事臣已

諄札接辦審案之平慶道沈鳴臯窮究夥黨以淨

根株均奏入

上命軍機大臣傳諭阿桂福康安曰據五岱等奏伏羌

賊人經官兵兩次勦殺遠近逆回自必聞風膽落而  
官軍日有起色已覺旌旆改觀計此時福康安早抵  
隆德而寧夏滿漢官兵據陳步瀛奏於二十六七等  
日業經到彼現在賊人屯聚隆德境內福康安與海  
蘭察巴圖魯侍衛等當趁此軍容振作之時將隆德  
等處賊匪以次勦捕淨盡如賊畏懼先逃必仍竄入  
石峯堡內福康安可遵照前旨必勦清後路然後帶  
兵前往設法四面堵截攻圍但仍宜嚴防後路為要

至陳步瀛節次所辦俱合機宜頗具識見殊為能事可嘉現據該臬司奏稱即日馳赴隆德將賊匪情形面稟福康安等語陳步瀛來往安定隆德一帶於該處賊情及路徑夷險自能熟悉伊既親赴隆德福康安得一能事之員面加詳細詢問於勦賊事宜更為有益再據陳步瀛奏固原州回匪馬昇貴城外靠城屋內挖有地窖可容數百人伊子馬漢龍城內靠城屋內亦挖有地窖等語地窖可容數百人必非馬昇

貴父子數人所能開挖亦非朝夕所能猝辦之事是  
蓄謀已久於城牆內外暗通欲為破城之計逆蹟顯  
然李侍堯平時竟漫無覺察以致養癰貽患其罪實  
無可逭而知州應知一州之事逆回如此近城掘窖  
肆行無忌何至毫無聞見如馬昇貴開掘地窖係前  
此知州任內之事而該州王琮能盤獲奸細是不但  
無過而且有功即應專治前任知州之罪如王琮已  
經抵任而馬昇貴猶公然開掘地窖事後方被查拏

到案其功過尚兩不相掩若開挖地窖竟係該知州任內之事賊犯又非其所盤獲即應將王琮嚴叅治罪著福康安詳晰詢明年月核其功罪據實具奏

同日何裕城奏言

臣先准陝西撫臣畢沅咨開陝

省現在趕配火藥委員赴豫採辦淨硝八萬斤趨

運陝省應用查火藥為軍務要需必須硝斤配製

若候委員到豫始行購辦未免有需時日臣隨札

行藩司墊發銀兩飛飭就近產硝各州縣上緊煎

鍊如數妥備一俟陝省委員到日立即交給領運  
茲復接畢沅札會現在軍營需用火藥陝局存貯  
不敷應用并囑預期籌備以待飛調查陝甘壤界  
毗連軍火急需必得多為儲備方可就近接濟臣

隨又查明撫鎮各標營現存火藥數目於貯藥較  
多各營分酌量分別動撥共足五萬斤之數密飭  
趕備齊全并即包裹堅好預派弁兵如陝省尚需  
備用一經咨調刻即解運起程以期倍加妥速奏

入報

聞

初十日癸巳五岱李侍堯剛塔俞金鑿圖桑阿阿

爾薩朗奏言

臣

等於二十八日午刻追賊至秦安

縣屬之土鼓山接據臬司陳步瀛靜寧州知州涂

躍龍稟稱二十五日辰刻逆回約有二三千人來

至靜寧城下焚燒東關現在督率兵役嚴加防守

懇請發兵救援

臣

等查現在伏羌一帶賊匪自伏

羌城外打仗二次復於雲霧山打仗一次賊人連敗奔逃現由土鼓山竄往蓮花城查蓮花城有兩路一走石峯堡一走靜寧州均係大路尚有山僻小路數處臣等帶兵壓下跟蹤追勦務期盡數殲擒查軍營現有滿漢土兵共五千餘名但靜寧現在緊急臣李侍堯前經知會寧夏阿拉善兵速由固原一路前赴隆德靜寧並已咨會福康安海蘭察入甘境後即可帶領該二處官兵勦捕東路之

賊今寧夏阿拉善兵丁尚未報明行抵何處勢難

懸待臣等再三籌酌軍營現在兵丁均係連日追

賊行走不免稍乏今即於此內挑派精壯一千六

百名令興漢鎮三德帶領星赴靜寧救援仍先派

兵一千名令副將和倫等帶領趕赴蓮花城迎截

土鼓山竄往之賊臣等將現存之兵全行帶領追

趕勦捕

同日興漢鎮總兵三德奏言

臣前經撫

臣畢沅奏

派帶兵一千名於鳳翔隴州一帶要隘堵禦逆回

嗣准督

臣李侍堯等檄調

臣所帶兵丁由秦州前

赴伏羌縣一帶迎擊賊匪

臣即於五月二十二日

自隴屬之長寧驛起程帶兵一千名由秦州一路

偵探賊踪至二十六日抵桌子坪山遇見賊匪

臣

即督率官兵施放鳥鎗奮勇迎勦殺賊六七十名

與督提

臣大營相距二十餘里至半夜間賊衆奔

走蓮花城一路

臣於次日率領官兵尾追勦捕

同日保寧成德奏言

臣

等帶領綠營兵六百名於

二十三日由成都起程一面飭令副將李天佑張

芝元等帶領屯練番兵迅速前至保縣等候今

臣

等於二十五日行抵保縣地方仍督飭屯練兵丁

一千六百名儕拉番兵二百四十名於二十七日

各隊陸續俱至保縣惟派出促浸番兵一百六十

名因路程較遠尚未能到

臣

等即於二十七日仍

分隊起程行走將促浸番兵一百六十名交都司

額爾亨額守備何連陞屯練守備丹比西喇布等  
星速隨後趕到再臣等督領屯練番兵迅赴保縣  
道經瓦寺地界該土司桑朗雍中率領土舍頭目  
等出迎叩頭告稱我等瓦寺土司世受

大皇帝厚恩非別部土司可比當此攻勦逆回之際正  
當報稱宣力瓦寺土兵曾經歷行陣者現有四百  
名我小土司年齒雖幼叔父土舍桑朗音春情願  
帶領頭目兵丁等殲滅逆回等語其願懇實出至

誠臣等又詢問副將李天佑等據稱屯練兵內尚可得一千四百名番兵內亦可得二百名合計瓦寺兵四百名共得番兵二千名臣等令其一併預為妥備以候調取應用伏祈

皇上訓示均奏入

上命軍機大臣傳諭阿桂福康安五岱曰據五岱等奏伏羌城外賊匪經官兵兩次擊殺五六百名又據三德奏稱於桌子坪山遇見賊匪殺死六七十名是南

路之賊所存無幾已不難迅速勦盡但三德帶兵由  
秦州前至伏羌本係在賊前面迎勦今賊竄回秦安  
三德與五岱等會合俱在後尾追何以未經兩面夾  
攻殊不可解茲五岱等又將該鎮派往靜寧而靜寧  
之賊已據陳步瀛奏稱於二十七日分竄是三德此  
時即應前赴隆德隨同福康安勦捕看來賊人因汧  
隴一帶有重兵防堵已不敢再行南竄惟賊計窮力  
竭或又思繞道往西竄赴河州勾合邪教匪徒復至

省城滋擾尤不可不預防範著傳諭五岱等詳查路徑設法派兵斷其去路并飛札哈當阿馮光熊令其一體嚴密防範勿致稍有踈虞至攻犯靜寧州城之賊昨據陳步瀛奏稱已經平涼府知府王立柱等督率兵民擊退賊人分為三股一股回石峯堡一股在底店一股往雷打灣又隆德縣稟報賊人現在縣屬之馬家坪及靜寧州之底店等處屯聚等語是靜寧州城外已無賊匪滋擾此時福康安所急宜勦辦者

又在馬家坪底店及石峯堡等處賊匪官兵疊次殺  
賊遠近逆回自無不聞聲膽落福康安正當趁此軍  
容振作之時由隆德以次進剿將後路肅清再赴石  
峯堡與五岱等四面堵截攻圍現在鹿鹿山已無賊  
匪傅玉等所帶之兵尚有二千福康安竟當速將此  
項官兵調至軍營會合勦捕兵力厚集賊匪更易迅  
速殲除再據保寧奏土練降番內尚可得一千六百  
名又四川瓦寺土司桑朗雍中稟稱該處可得土兵

四百名共計二千名俱情願跟同赴甘勦賊等語此時甘省勦辦賊匪大局已定而保寧所帶初調之土練降番二十九日尚在保縣未能即抵甘省若續行檄調更不免有需時日徒勞往返著福康安酌量情形如尚有必要添調此項番土各兵之處即一面飛咨檄調一面奏聞如該處兵力已足即知照李世傑停其預備

同日馮光熊奏言臣於五月二十九日接臬司陳

步瀛札知攻擾靜寧之賊經官兵擊退後現又竄  
往梁家河距會寧止四十餘里急須添兵防守查  
前據靜寧州稟報賊匪攻犯經臣酌撥蘭州防護  
之甘標兵五百名飛飭前往應援此項官兵須由  
會寧至靜寧今靜寧州之賊既竄往梁家河距會  
寧不遠該處僅有滿兵三百名仍恐單弱臣業已  
飛移臬司即將前項官兵飭令兼程星赴會寧協  
同防堵其靜寧州現據具報督臣派撥中衛協兵

四百名涼肅二鎮標兵四百名業已到彼如賊匪  
已退即可躡踪應援會寧前後夾勦更覺得力

臣

仍催續調之甘涼官兵迅速來蘭以備派撥策應

再靖遠賊匪前督臣李侍堯親往督勦業已完竣

但該處多係山谷尤易藏奸恐有餘匪竄匿節經

飭令附近各地方官多派員役如意偵探截拏茲

督臣札知據莊浪營叅將王永茂呈報西番窯等

處現有賊匪三四十人又據靖遠縣稟報萱帽塔

北山內有賊匪約三百餘人飛令靖遠協副將王  
柱帶兵二百名同莊浪營參將王永茂帶兵二百  
五十名前往會合勦捕臣復飛飭皋蘭靖遠等縣  
再行添撥壯役民夫於各要隘截拏奏入報  
聞

同日敷倫泰奏言臣帶領綠營兵五百名前至隴  
州查隴州東界汧陽麟遊一帶綿亘五六百里其  
最要者自隴州所屬之長寧驛至商家庄二百餘

里中間要隘既多而小路亦復不少臣將所帶兵

五百名自長寧驛起至商家庄隘口以及崎嶇小

徑約有十五處分設卡倫城中亦留兵看守嗣有

畢沅續派西安滿兵五百名到來臣即酌量要處

添設嚴行防守查辦仍曉諭居民現在大兵節次

到齊賊匪不久殲滅爾等毋得驚惶仍各安本業

居民等經撫慰之後俱各安堵奏入報

聞

欽定四庫全書

附

欽定石峯錄

三三

欽定石峯堡紀畧卷九